

NIKACHOJMIRISAJ RI KA TALENTOS

Chikajujunal roj c'o ri achique yojtiquir nikaben utz. Re' nibix talentos chire. Ri ka talentos, jari' ri sipanic ri nuya' ri Ajaf chike. Tok xojalex pe, xkaq'uen kiq'uin ri achique yojtiquir nikaben utz (tatz'eta' c'a ri tanaj 2 chupan re vuj re'). Roj konojel c'o ri achique yojtiquir nikaben utz (ri ka talentos).

JALAJOJ RUVech RI KA TALENTOS

Ri profeta Moisés ja rija' jun nimalej uc'uey bey. Pero man xtiquir ta xch'abalin utz chiquivech ri vinaki'. Ri rach'alal rubini'an Aarón xcha'ox richin xuto' ri Moisés. Ri Aarón nitiquir nich'abalin utz chiquivech ri vinaki' (tatz'eta' c'a ri Exodo 4:14-16). E c'o vinaki' ri e utzilej tak uc'uey bey chuka' achi'el ri Moisés. Y ch'aka' e utzilej tak tzijonela' achi'el ri Aarón. Ch'aka' yetiquir yebixan utz o yek'ojo-man. Ch'aka' utz ye'etzan ri futbol. Ch'aka' utz yesamej riq'uin ri quik'a'. Ch'aka' utz yetijon o utz nik'ax chiquivech ri achique nic'atzin chire jun chic vinek. Ch'aka' utz niquicoch' ri c'ayeval.

Tabij chique chiquijujunal ri vinaki' chi tiqubij achique nitiquir nuben utz jun chic vinek ri c'o chunakaj.

NIC'ATZIN CHI NIKACUSAJ RI KA TALENTOS Y NIKACHOJMIRISAJ

Ri Chicajel Katata' rubin chike chi nic'atzin chi roj nikac'ul ri sipanic ri nuya' rija' chike (DyC 88:33). Re' nibec'ulun chikavech chi c'o chi nikabanala' ri achique yojtiquir nikaben utz y nikachojmirisaj. C'o bey nikach'ob chi roj xa manek ka talentos. O chuka' nikach'ob chi ri ch'aka' chic vinaki' yalan q'uiy ri qui talentos chikavech roj. C'o bey man nikacusaj ta ri ka talentos roma xa nikach'ob chi man



can ta utz xtikaben chire, o nikach'ob chi ri juley chic vinaki' xquetze'en chikij. Man utz ta nikevaj can achique yojtquir nikaben. Nic'atzin chi can nikabanala'. C'a c'ari', ri ch'aka' chic xtiquitz'et ri utzilej tak kabanobal y xtiquiya' ruk'ij ri Katata' c'o chila' chicaj (tatz'eta' c'a ri Mateo 5:16).

¿Achique roma nic'atzin chi nikachojmirisaj ri ka talentos?

¿ACHIQUE MODO XTIKACHOJMIRISAJ RI KA TALENTOS?

C'o ri nikaben richin nikachojmirisaj ri ka talentos. Nabey, nic'atzin chi nikanabej achique ri yojtquir nikaben utz. Nic'atzin c'a chi nikanic'oj ka ki' richin nikanabej ri achique yojtquir nikaben. Ri ka familia y ri kachibil xkojquito' richin nikanabej re ka talentos re'. Utz nikac'utuj chire ri Tata'ixel chi kojruto' chunabexic achique ri yojtquir nikaben utz.

Ruca'n, nic'atzin chi nikatij kak'ij richin nikaben ri talento ri nikarayij.

Rox, c'o chi nikacukuba' kac'u'x chi ri Tata'ixel xkojruto'. Nic'atzin chuka' chi nikacukuba' kac'u'x riq'uin ri nikaben.

Rucaj, nikil ri etamabal ri nic'atzin richin ruchojmirisaxic ri ka talento. Nic'atzin c'a chi yojbe pa tijobel, o nikac'utuj chire jun kachibil chi kojruto', o nikanic'oj rupan jun vuj richin nikil ri etamabel ri nic'atzin chike.

Ro', c'o chi nikabanala' ri ka talento k'ij k'ij. Nic'atzin chi yojsamej y nikatij kak'ij richin nikachojmirisaj ri achique yojtquir nikaben. Man nisipex ta chike jun talento chek queri', xa c'o chi nikach'ec pe.

Ruvak, nic'atzin chi nikacusaj ri ka talento quiq'uin ch'aka' chic vinaki'. Nikachojmirisaj ri ka talento tok nikabanala' binakel (tatz'eta' c'a ri Mateo 25:29).

Ronojel re' man can ta c'ayef vi yojch'o riq'uin ri Ajaf y nikac'utuj chi kojruto'. Ri Ajaf nurayij chi nikachojmirisaj ri achique yojtquir nikaben, y rija' can xkojruto' vi.

Tatzijoj jun a talento. ¿Achique modo xttiquir xtril jun vinek re talento re'? Tac'utuj chire jun vinek chi tutzijoj achique modo xril ri ru talento rija'.

C'O MODO RICHIN NIKACHOJMIRISAJ RI KA TALENTOS, STAPE' MAN NIM TA RI KUCHUK'A'

C'o bey ri Ajaf nuben chi man nim ta ri kuchuk'a' pa ruvi'

jun talento. Roma c'ari', nic'atzin chi janíla yojsamej richin nikachojmirisaj ri talento ri'. Ri Ajaf xkojruto' richin utz nikaben ri man xojtquir ta xkaben tok rubanon can (tatz'eta' ri Eter 12:27). Ri Beethoven ja rija' jun achin ri utz xutz'ibaj ri música. Xutz'ibaj jebelilej música tok rija' xa t'oj. Jun chic achin rubini'an Demóstenes manek cuchuk'a' ri ru pulmones y man nich'o ta utz. Man riq'uin vi ri', rija' xoc jun utzilej tzijonel.

Ch'aka' chic vinaki' quic'ovisan c'ayef tak pokonal richin niquichojmirisaj ri qui talentos. Tok xuben jun nimalej silonel, jun nimalej jay xtzak pa ruvi' jun Elder. Rija' janíla xyaloj richin xel pe chuxe' ri jay ri'. Juba' man xcom. Conojel ri ak'omanela' xquibij chi can c'o chi xticom vi. Rija' man xtiquir ta xbiyin y man xtiquir ta xusiloj ri raken. Janíla xyavej. Pero cukul ruc'u'x riq'uin ri Ajaf, y xutij ruk'ij richin xc'oje' chic ruchuk'a'. Janíla xyaloj pa hospital, pero ekal ekal xc'achoj. Xril chic ruchuk'a' ri raken y xbiyin jun bey chic. C'a c'ari', xu chop chic rutzijoxic ri utzilej rutzijol.

Ri Heber J. Grant xeruchojmirisaj q'uiy tak ru talentos stape' man nim ta ri ruchuk'a' pa rutiquiribel. Quere' c'a xubij rija': "Ri nikabanala' binakel man c'ayef ta chikavech. Man nijalatej ta rubaniquil ri nikaben, xa ninimer ri kuchuk'a' chubanic."

Tasiq'uij c'a ruvech ri Eter 12:27. ¿Achique c'o chi nikaben richin chi xtkil kuchuk'a' pa ruvi' jun talento?

RI AJAF YOJRUTURUSAJ TOK UTZ NIKACUSAJ RI KA TALENTOS

Ri Presidente Joseph F. Smith quere' xubij: "Yatajinek can jun talento chique conojel ri ruc'ajol y ri rumi'al ri Dios. Y chiquijujunal ri ralc'uala', quiq'uin rije' nicanej vi ri rucusaxic ri talento ri'." Jun talento jari' jun samaj chupan ri rajavaren ri Dios. Ri c'ambel tzij richin ri talentos nutzijoj chi tok utz nikaben ri kasamaj chupan ri rajavaren ri Dios, xtiyatej ch'aka' chic kasamaj chupan ri rajavaren. Riq'uin c'ari', nikac'ul ch'aka' chic turusanic chuka'. Vi man utz ta yojsamej, xa xtelesech c'a el ri kasamaj chupan ri rajavaren ri Dios (tatz'eta' c'a ri Mateo 25:14-29).

Ri lok'olej tak tz'ibanic niquibij chike chi xtik'at tzij pa kavi' chirij ri kabanobal (Mateo 16:27). Nikaben utzilej samaj tok nikacusaj ri talentos richin yekato' ri ch'aka' chic vina-ki'.

Ri Ajaf niqicot tok utz nikacusaj ri ka talentos. Vi nikacusaj ri ka talentos richin yekato' ri ch'aka' chic vinaki' y richin nikanimirisaj ri rajavaren ri Dios chuvach'ulef, rija' xkojruturusaj. Roj xtilkil na ri quicoten y ri ajovabel tok yojsamej coma ri kach'alal vave' chuvech re ruvach'ulef. Chuka' xtiketamaj xtikachojmirisaj ki'. Ronojel re' nic'atzin chike vi nikajo' yojbe chic jun bey acuchi c'o vi ri Chicajel Katata'.

Tasiq'uij ruvech ri c'ambel tzij richin ri talentos ri c'o chupan ri Mateo. C'ari' catzijon c'a chirij.

CH'AKA' CHIC MOCAJ RI UTZ YE'ANIC'OJ

Santiago 1:17 (ri sipanic e petenek riq'uin ri Dios)

DyC 46:8-9; 1 Timoteo 4:14 (tachoimirisaj c'a ri sipanic)

2 Corintios 12:9 (niya'ox ruchuk'a' ri manek ruchuk'a')

Apocalipsis 20:13; 1 Nefi 15:33; DyC 19:3 (nik'at tzij pa kavi' chirij ri kabanobal)

Hebreos 13:21; Mateo 5:16 (tac'utu' c'a utzilej tak banobel)

JUN BIX RI UTZ NABIXAJ

"¿La Xach'o Cami Riq'uin Dios?"

RI NIMEY TZIJ

Tok ri Jesús xc'oje' chuvach'ulef, jun etamanel achin que-re' xuc'utuj chire:

"Tijonel, ¿achique cami pixa' más nim chiquivech conojel ri ch'aka' chic pixa'? Ri Jesús xubij chire: Tavajo' ri Ajaf ri a Dios riq'uin ronojel ac'u'x, y ronojel avánima, y ronojel anojibal.

"Jare' ri nabey y ri nima pixa'.

"Ri ruca'n junan achi'el re'. Tavajo' ri avachibil achi'el navajo' ka avi' rat.

"Re ca'i' pixa' re' e ruc'u'x ronojel ri ley y ri quitz'iban can ri profeta'i'" (Mateo 22:36-40).

Re mocaj re' niquic'ut chikavech chi janíla c'atzinel chi nikajo' ri Ajaf y yekajo' ri ch'aka' chic vinaki'. ¿Achique cami modo xtikac'ut chuvech ri Ajaf chi roj nikajo' rija'?

Quere' c'a xubij ri Jesús: "Ri e c'o ri nupixa' riq'uin, y yerutakej, jari' ri yirajo'. Y ri yirajo', rija' xtajovex roma ri Nata'" (Juan 14:21).

NIC'ATZIN CHI NIKANIMAJ TZIJ RIQ'UIN JUN UTZILEJ KARAYIBAL

Utz nikac'utuj chike chikajujunal achique roma tok yekata-kej ri rupixa' ri Dios. ¿La nikaxibij ki' chuvech ri Dios? ¿La nikanojij chi xtikac'ul c'ayeval vi man yekatakej ta? ¿La yekatakej ri rupixa' ri Dios roma nikarayij ri ch'acoj ri nipe tok kac'uan jun utzilej c'aslen? ¿La yekatakej cami roma nikajo' ri Dios y ri Jesucristo y nikarayij yojsamej coma rije'?

Vi yekatakej ri rupixa' ri Dios roma xa nikaxibij ki', jari'

más utz chuech ri man nikatakej ta manjun pixa'. Pero más xkojqicot vi yekatakej ri rupixa' ri Dios roma can nikarayij vi chi yekatakej y man xaxe ta roma nikaxibij ki'. Tok man nikak'et ta ki' chunimaxic rutzij, rija' man nuk'et ta ri' chikaturusaxic. Quere' xubij: Yin, ri Ajaf, yiquicot richin ninya' quik'ij ri vinaki' ri yesamej voma riq'uin ri ruchojmlal y riq'uin ri kitzij c'a pa ruq'uisibel (tatz'eta' c'a ri DyC 76:5). Ri nimey tzij yojruto' richin nijote' ri kac'aslen y yojocyaj junan riq'uin ri Tata'ixel. Pero manek quich'acoj ri vinaki' ri manjun niquben xa c'a tok yepixabex y c'ari' yequitakej ri pixa' riq'uin c'ac'a' quic'u'x (tatz'eta' c'a ri DyC 58:29).

Tasiq'uij ruvech ri DyC 58:26-29. ¿Achiqne roma nic'atzin chi yekatakej ri pixa' riq'uin jun utzilej karayibal?

C'O MODO NIKANIMAJ TZIJ TOK MANJANI TIK'AX CHIKAVECH RI ACHIQUÉ ROMA NIC'ATZIN CHIKE

Tok yekatakej ri rupixa' ri Dios, nikachojmirisaj apon ki' chuc'ulic ri c'aslen richin jumul riq'uin rija'. C'o bey ri man ketaman ta achiqne roma ri Dios ruya'on jun rupixa'. Man riq'uin vi ri', nic'atzin chi nikac'ut chuech ri Dios chi cukul kac'u'x riq'uin. Roj nikac'ul re' tok nikanimaj rutzij y xa man ketaman ta achiqne roma. Ja c'are' ri xuben ri Adán.

Xbitej chique ri Adán y ri Eva chi tiquibana' c'a jun sujunic chire ri Ajaf. Jun k'ij jun ángel xpe riq'uin ri Adán y xuc'utuj chire achiqne roma tok xuben ri sujunic. Ri Adán xubij chi man retaman ta achiqne roma. Xaxe retaman chi queri' rubin can ri Dios (Moisés 5:5-6).

C'a c'ari', ri ángel xuc'ut ri utzilej rutzijol chuech ri Adán, y xutijoj chirij ri Colonel ri petenek. Ri Uxlabixel xkaka pa rivi' ri Adán, y rija' xuya' lok'olej rutzijol chiquij conojel ri vinaki' ri e petenek chuvach'ulef (tatz'eta' c'a ri Moisés 5:9-10; DyC 107:56). Ri Adán xril re etamabel re' y re turusanic re' roma xunimaj rutzij ri Dios.

¿Achiqne roma tok utz nikanimaj rutzij ri Dios, tok c'a manjani tik'ax chikavech ri runojibal?

RI DIOS XTUCHOJMIRISAJ JUN RUBEYAL

Ri Vuj richin ri Mormon nutzijoj chi ri Ajaf xuya' jun c'ayef samaj chique ri Nefi y ri runimal (1 Nefi 3:1-6). Ri runimal ri Nefi xexebeloy y quere' xquibij: "C'ayef rubanic ri nac'utuj chike." Jac'a ri Nefi quere' xubij: "Xquibe c'a y xtinben

ronojel ri rubin can ri Ajaf chuve. Roma vetaman c'a chi manjun pixa' nuya' ri Ajaf chique ri vinaki', vi man ta nuchojmirisaj ri bey chiquivech, richin chi xtiquiben ri achi-que rubin can chique'' (1 Nefi 3:7). Tok nikana' chi c'ayef richin yekatakej ri rupixa' ri Ajaf, utz noka' chikac'u'x ri ruch'abel ri Nefi.

Tabana' chi ri e c'o chiri' niqetamaj chi utzil ri 1 Nefi 3:7.


Tac'utuj chique ri e c'o chiri' chi tiqitzijoj ri xuben ri Dios chupan ri quic'aslen richin yeruto' richin niqitakej ri rupixa'.

CONOJEL RI NIMA'K TAK PIXA' Y RI CH'UTI'K TAK PIXA' C'O CHI YETAKEX

Jantek nikach'ob chi c'o jun pixa' ri man can ta nic'atzin. Ri lok'olej tak tz'ibanic niqitzijoj ri xuc'ulvachij jun achin ri queri' xuch'ob (2 Reyes 5:1-4). Ri achin rubini'an Naamán. Rija' ruc'uan jun c'ayef yabil. Xel chupan ri Siria y xbe Israel chuc'utuxic chire ri profeta Eliseo chi tuc'achojirisa. Ri Naamán jun nimalej achin chupan ri tinamit. Xpe royoval tok ri Eliseo man xuc'ul ta. Ri Eliseo xa xutek el jun rusamajel chuc'ulic ri Naamán. C'ari', nic'o ruvi' royoval ri Naamán tok xrac'axaj ri rupixabanic ri Eliseo. Ri Eliseo xupixabaj chi tibe'atin vuku' mul chupan ri raken ya' rubini'an Jordán. Ri Naamán xubij quere': "¿La man ta cami más utz ri ya' chupan ri Damasco que chuvech ronojel ri ya' chupan ri Israel? ¿La man ta cami xquich'ajch'ojir vi yinatin chupan ri ya' ri'?" Janíla xuben royoval y xel el chiri'. Jac'a ri rusamajela' quere' xquic'utuj chire: "Vi ta nim ri xubij ri profeta chave, ¿la man ta c'a xtaben? ¿Achi que c'a roma man ta xtaben tok xubij chave, 'xa catatin y cach'ajch'ojir'?" Xk'ax chuvech ri Naamán chi can nic'atzin vi chi xunimaj rutzij ri profeta richin ri Dios, stape' man nim ta ri xubij. Roma c'ari' xbe'atin chupan ri Jordán y xc'achoj.

C'o bey nikach'ob chi jun pixa' janíla nim y xa man yojtiquir ta nikatakej. Oj junan quiq'uin ri runimal ri Nefi, y nikabij: "C'ayef rubanic ri nac'utuj chike." Man riq'uin vi ri', más ta utz nikach'ob achi'el ri Nefi: "Manjun pixa' nuya' ri Ajaf chike vi man ta nuchojmirisaj nabey jun rubeyal richin xtikatakej ri pixa' ri'."

Ri Dios xubij chire ri Abraham chi tucamisaj ri ruc'ajol rubini'an Isaac pa jun sujunic. Jari' can c'ayef vi (tatz'eta' c'a ri Génesis 22:1-13 y tatz'eta' chuka' chupan re vuj re'





ri tanaj 26 rubini'an "Ri Sujunic"). Q'uiy juna' xroyobej ri Abraham ri ralaxic ri Isaac. Ja rija' ri ruc'ajol ri xusuj can ri Dios chire. ¿Achique roma quere' xtusech ri ruc'ajol? Riq'uin juba' ri Abraham man xurayij ta xuben ri xubij ri Dios. Man riq'uin vi ri', ri Abraham xrelesaj el pa rujolon ri xunojij y xunimaj rutzij ri Dios. Ri Ajaf utz xutz'et ri rurayibal ri Abraham richin nuben ri rubin ri Dios. C'ari' ri Dios man xuya' ta chi ri Abraham xucamisaj ri Isaac.

Nic'atzin chi roj chuka' c'o karayibal richin nikaben ronojel ri nubij ri Dios chike. Ri Profeta José Smith quere' xubij: "Jare' xtinben jantape': tok ri Ajaf xtubij chuve chi tabana' re', yin can xtinben vi." Utz vi quere' nikaben roj chuka'.

¿Achique modo nikil kuchuk'a' tok yekatakej ri rupixa' ri Dios?

RI JESUCRISTO XUNIMAJ RUTZIJ RI RUTATA'

Ri Jesucristo can xuc'ut vi chikavech achique modo utz nikanimaj rutzij ri Chicajel Katata'. Quere' c'a xubij: "Roma xika' pe chicaj, man chubanic ta nurayibal, xa ja ri rurayibal ri in takayon pe" (Juan 6:38). Xutij ruk'ij chijun ruc'aslen richin xunimaj rutzij ri Rutata'. Jare' c'ayef chire rija' chuka'. Rija' janíla xtojtohex achi'el conojel ri vinaki' ri e c'o chuvech re ruvach'ulef. (Hebreos 4:15). Chupan ri cotz'ijbel rubini'an Getsemani, rija' xuc'utuj ak'anij chire ri Rutata' vi manek ta modo richin man ta xe'rutija' ri pokonal, ni ta chuka' tibecamisex chuvech ri cruz. C'a c'ari', pa ruq'uisibel ri lok'olej ruch'oven, quere' xubij: "Y mani achi'el ri ninvajo' yin. Ja ta ri achi'el navajo' rat" (Mateo 26:38).

Que c'are' xubij ri Apóstol Pablo: "Y stape' C'ajolaxel vi, xretamaj niniman roma ri xuc'ovisaj. Y tok c'achojirinek chic, xoc ralaxibal ri colotajic jumul quichin conojel ri yeniman richin" (Hebreos 5:8-9).

Ri Jesús xtiquir xuben ri colotajic roma xuben ri rurayibal ri Tata'ixel jantape'. Romari' konojel roj yojtquir yojcolotej vi nikanimaj rutzij ri Chicajel Katata'.

¿Achique modo yojruto' ri rubanobal ri Colonel richin xtikanimaj rutzij ri Dios?

RI XTIC'ULVACHITEJ VI NIKANIMAJ TZIJ Y RI XTIC'ULVACHITEJ TOK MAN NIKANIMAJ TA TZIJ

E c'o pixa' chupan ri rajavaren ri caj, y tok niyatej jun turusanic chike, jari' xa roma kataken ri pixa' acuchi nalex

vi pe ri turusanic ri' (tatz'eta' c'a ri DyC 130:21; 132:5). R Ajaf rubin chi vi nikatij kak'ij chi utzil y nikanimaj rutzij, xkojtiquir xtikac'ul etamabel y nojibel (tatz'eta' c'a ri DyC 130:18-19). Chuka' xkojtiquir xkojnimer pa espíritu (tatz'eta' c'a ri Jeremías 7:23-24). Man riq'uin vi ri', vi xa man nikanimaj ta tzij, yojbison y nikasech el ri katurusanic. Ri Ajaf quere' xubij: ¿In achique cami yin, nubij ri Ajaf, vi c'o nubin can y xa man ta ninben? Yin yentek, y ri vinaki' man niqinimaj ta tzij. Ninvelesaj pe ri taken, y rije' man niquic'ul ta chic ri turusanic. C'ari', quere' niqubij pa cáni-ma: Man ja ta re' ri rusamaj ri Ajaf, roma man nibanatej ta ri xusuj can'' (DyC 58:31-33).

Tok yekatakej ri rupixa' ri Ajaf, rija' can nuben vi ri nusu. Que c'are' xubij ri Benjamin chique ri ruvinak: ". . .nuc'utuj chi tibana' ri achique rubin can chive. Vi niben c'a queri', rija' cha'nin yixrururusaj'' (Mosia 2:24).

Titz'eta' c'a ivonojel ruvech ri Jeremías 7:23-24.

¿Achique niquic'ulvachij ri vinaki' ri man niqinimaj ta tzij.

RI E NIMAYON TZIJ NIQUIL RI C'ASLEN RICHIN JUMUL

Jare' yojrunataj ri Ajaf: Vi ye'atakej ri nupixa' y yacoch'on c'a pa ruq'uisibel, xtic'oje' c'a ac'aslen richin jumul. Y jari' ri nimalaxel rusipanic ri Dios (tatz'eta' c'a ri DyC 14:7).

Ri Ajaf ruk'alajirisan pe ch'aka' chic turusanic ri xqueyatej chique ri yeniman rutzij pa ruchojmilal c'a pa ruq'uisibel:

Nim ri quich'acoj y man q'uisel ta ri quic'ojelema.

Y xtink'alajirisaj chiquivech ronojel ri evan etamabel, ja', ronojel ri evan etamabel richin ri vajavaren ri nitiquir el chupan ri ojer tak k'ij. Y chupan ri juna' chikavech apon, xquentijoj chire ri utzilej nurayibal chirij ronojel ri c'o chupan ri vajavaren.

Ja', xtiquetamaj ri meyel tak etamabel richin ri man q'uisel ta. Y xtinc'ut chiquivech ri xtic'ulvachitej apon, ja', ri xti-c'ulvachitej chupan q'uiy tak iyaj mamaj ijatzul.

Y ri utzilej quinojibal xtoc nim, y ri quetamabal xtuk'i' ri caj. . .

Roma yin xquensakirsaj riq'uin ri nu Espíritu. Y riq'uin ri vuchuk'a' xquentijoj che ri evan nojibel richin ri nurayibal.

Ja', xquentijoj chire ri achique man tz'etel ta roma runak' ruvech jun vinek, y man nac'asex ta, y man oquinek ta pa ruc'u'x jun vinek (tatz'eta' c'a ri DyC 76:6-10).

Tasiq'u'ij ruvech ri 2 Nefi 31:16.

¿Achique roma tok janila nic'atzin chi yojcoch'on c'a pa ruq'uisbel?

CH'AKA' CHIC MOCAJ RI UTZ YE'ANIC'OJ

Abraham 3:25 (oj petenek chuvach'ulef richin xtetamex vi yojtquir nikanimaj tzij)

1 Samuel 15:22 (más c'atzinel ri nimey tzij que chuvech ri sujunic)

Eclesiastes 12:13; Juan 14:15; Romanos 6:16; DyC 78:7; DyC 132:36; Deuteronomio 4:1-40 (nic'atzin chi nikanimaj rutzij ri Dios)

2 Nefi 31:7 (ri Jesucristo xunimaj tzij)

Proverbios 3:1-4; 6:20-22; 7:1-3; Efesios 6:1-3; Colosenses 3:20 (nic'atzin chi ri ac'ua-la' niquinimaj quitzij ri quite' quitata')

DyC 21:4-6 (tanimaj rutzij ri profeta)

Juan 8:31-32; Mosia 2:22, 41; DyC 82:10; 1 Nefi 2:20 (ri turusanic ri yepe tok nikanimaj tzij)

DyC 58:21-22; DyC 98:4-6; DyC 134 (tanimaj ri k'atbel tzij richin ri tinamit)

Isaías 60:12; DyC 1:14; DyC 93:39; DyC 132:6, 39 (ri xtic'ulvachitej vi man nikanimaj ta tzij)

2 Nefi 31:16; DyC 53:7; Mateo 24:13; Lucas 9:62 (nic'atzin chi yojcoch'on c'a pa ruq'uisbel)

C'O JUN RUBEYAL RICHIN CHI RI FAMILIA XQUEC'OJE' JUNAN JUMUL

Ri nabey familia chuvach'ulef xbanatej tok ri Chicajel Kattata' xuben chi ri Adán y ri Eva xec'ule' (tatz'eta' c'a ri Moisés 4:21-24). Vacami bitajinek chike roj chikajujunal chi koj'ule' y xquec'oje' calc'ual. Queri' yojtiquir niketamaj richin xkojoc te'ej tata'aj chila' chicaj. Ri Presidente Brigham Young xubij chi ri ka familia man kichin ta can roj vacami. Ri Ajaf e ruya'on pe chike ri ka familias richin nutz'et vi utz nikaben quiq'uin. Xaxe vi nikaben ri utz, xqueyatej ri ka familia chike richin jumul. Ri nikaben chuvach'ulef xtuk'ijuj vi ruc'amon yojoc te'ej tata'aj chila' chicaj (tatz'eta' c'a re vuj re', ri tanaj 2, rubini'an, "Ri Ka Familia Chila' Chicaj").

NIC'ATZIN RI KA FAMILIA

Tok ri Dios ruya'on chic ri Eva chire ri Adán, xubij chique chi quec'oje' calc'ual (tatz'eta' c'a ri Génesis 1:28). Chuka' xubij chique chi rije' e c'ulan richin niquben ch'aculaj quichin ri ralc'ual ri e espíritu. Ri te'ej tata'aj e rachibil ri Dios. Rijaj' nurayij chi conojel ri ralc'ual ri e espíritu yepe chuvach'ulef y niqic'ul jun quich'acul. Tok yec'oje' calc'ual chuech re ruvach'ulef, nikato' ri Tata'ixel chubanic ri rurayibal.

Nic'atzin chi janíla yojquicot tok nalex pe jun chic calc'ual. Checonojel ri calc'ual e ralc'ual ri Dios chuka'. Nic'atzin chi oj c'o quiq'uin ri calc'ual y yojetz'an quiq'uin y yekati-joj.

Quere' c'a xubij ri Presidente David O. McKay: "Yin ninnimaj riq'uin ronojel ri vánima chi ri rachoch jun vinek, jare' ri utzilej c'ojlibel acuchi nuchojmirisaj ri' richin ri c'aslen richin jumul. Chupan ri kachoch niketamaj yojsamej y ni-

ketamaj utzilej tak na'oj. Niketamaj yojajovan, y yojya'on, y yekato' ri ch'aka' chic."

Ri quisamaj ri te'ej tata'aj ja richin yequitijoj ri calc'ual chirij ri Katata' c'o chicaj. Nic'atzin chi niq'ic'ut chiquivech chi rije' nicajo' ri Tata'ixel roma yequitakej ri rupixa'. Nic'atzin chuka' chi ri te'ej tata'aj yequitijoj ri calc'ual richin yech'o riq'uin ri Dios y richin yequitakej ri rupixa' (tatz'eta' c'a ri Proverbios 22:6).

¿Achique roma tok ri Ajaf xuya' pe ri ka familias?

¿Achique roma tok ri kachoch jari' jun utzilej c'ojlibel acuchi xtikachojmirisaj ki' richin ri c'aslen richin jumul?

RI FAMILIA RICHIN JUMUL

C'o modo richin chi ri ka familia yec'oje' junan jantape'. Pero nic'atzin chi yojc'ule' chupan ri lok'olej nimajay richin ri Ajaf (ri templo) richin nikac'ul re turusanic re'. Tok ri vinaki' yec'ule' pa jun chic c'ojlibel, xa niq'uis ri c'ulanen tok nicom ri ixjayilonel o ri achijilonel. Tok yojc'ule' chupan ri lok'olej nimajay richin ri Ajaf roma ri Aj Chicajel Uchuk'a' richin ri Melquisedec, oj c'ulan richin re ruvach'ulef y richin jumul. Ri camic man yojruch'er ta el. Vi yekatakej ri rupixa' ri Dios, ri ka familia xquec'oje' junan benek ruvech. Ri tata'aj y ri te'ej y ri ac'uala' xquec'oje' junan benek ruvech.

Tatzijoj ri c'o chi nikaben richin xkojc'oje' junan jantape' quiq'uin ri ka familia.

NIKAJO' KI' CHUPAN RI KA FAMILIAS

Nic'atzin chi ri achijilonel y ri ixjayilonel yecajo' qui' chiquivech. Man utz ta nikabij ri achique xtuben chi nibison ri jun chic. Man utz ta nikaben chi ri jun chic nuc'ovisaj pokonal. Nic'atzin chi nikaben ronojel janipe' ri yojtiquir richin niq'icot ri kachibil.

C'o kasamaj chuka' richin yekatijoj ri kalc'ual, richin queri' yecajo' qui' chiquivech. Quere' nubij ri Benjamin chupan ri Vuj richin ri Mormon: ". . .man xtiya' ta k'ij chi rije'. . .niquichapala' qui' chiquivech y yetojojen. . . .Xa xque'itijoj richin xquebiyin chupan ri bey richin ri kitzij y ri utzilej na'oj. Xque'itijoj richin chi xticajo' qui' y xtiq'uitola' qui' chiquivech" (Mosia 4:14-15).

C'o c'a modo richin nikatola' ki' chupan ri familia. C'o modo nikaya' quik'ij ri ka familia tok utz ri niq'iben. Riq'uin c'ari', rije' utz niquina' pa cánima chirij ri quibanon.



Nic'atzin chi chiquijujunal ri ac'uala' niquina' pa cáñima chi yekajo'. Nic'atzin chi nikac'ut. chiquivech chi ri niquiben, roj nikajo' niketamaj. Utz nikabij chique ri calc'ual chi yekajo'. Que c'a chuka' re', nic'atzin chi ri ac'uala' niquic'ut chi yecajo' ri quite' quitata'. Nic'atzin c'a chi ri ac'uala' niquinimaj quitzij ri quite' quitata', y niquic'uaj jun utzilej c'aslen richin queri' ri quite' quitata' yequicot quiq'uin. Nic'atzin chi niquiya' quik'ij ri quite' quitata'.

Tasiq'uij ruvech ri Efesios 4:29-32.

¿Achique modo nikaben ri utzilej na'oj chupan ri kachoch?

RI RUBEYAL CHUBANIC JUN UTZILEJ FAMILIA

Ri Presidente Harold B. Lee quere' xubij: "Ri más c'atzinel samaj ri xtiben chupan ri rusamaj ri Ajaf, ja ri samaj ri xtiben chupan ri ivachoch."

Quere' chuka' nutzijoj vave':

Jun k'ij ri Presidente Kimball xequic'uluba' jun c'ulaj chupan ri lok'olej nimajay richin ri Ajaf. C'a c'ari', xtzijon juba' quiq'uin ri quite' quitata' ri c'ulbela'. Ri jun tata'aj xubij: Yin riq'uin ri vixjayil man nim ta kak'ij. Man q'uiy ta kach'acon chupan ri kac'aslen. Man riq'uin vi ri', janíla yojquicot quiq'uin ri ka familia. C'ari', ri tata'aj xubij chi e c'o vakxaki' calc'ual y conojel e c'ulan chic chupan ri lok'olej nimajay richin ri Ajaf. Conojel e c'o chupan ri K'ataj y can cukul vi quic'u'x. Y yequitijoj ri qui familias chire ri utzilej rutzijol.

Ri Presidente Kimball xutzu' ri ruk'a' ri achin y ri ruvech. Janíla samajinek chupan ri ruc'aslen. C'ari' xubij: Rat atzijon chuve jun nimalej banobel chire ri ac'aslen. Rix xiben ri achique rayin chivij chi niben tok xixtak pe chuvach'ulef. Utz nic'uaj ri ic'aslen y ivalc'ualan y iq'uiytisan re utzilej familia re'. Y e itijon riq'uin cukubabel c'u'x. Riq'uin c'are' janíla ich'acon rix. Quixruturusaj c'a ri Dios.

Ri Satanás retaman chi ri familias yalan e c'atzinel che ri runojibal ri Tata'ixel. Ri etzelal nutij ruk'ij richin chi man ta yojjel apon riq'uin ri Ajaf, y man ta nic'oje' ri ru espíritu kiq'uin, richin queri' yeq'uis ta ka ri ka familia. Ri Satanás xkojruk'ol richin niquijech el qui' ri ka familia.

Roj konojel nikarayij chi ri ka familia niquiben ri utz y yequicot. Vi can quere' ri nikarayij, utz nikaben quere':

1. Nikaben jun lok'olej ch'oven riq'uin ri Dios junan quiq'uin ri ka familia ronojel nimak'a' y ronojel ak'a' (tatz'eta' c'a ri 3 Nefi 18:21).
2. Yekatijoj ri kalc'ual chire ri utzilej rutzijol. Jari' nikaben tok nikamol ki' ronojel semana chikatijoxic ki' chire ri utzilej rutzijol. Ri H. Burke Peterson quere' xubij: "Man utz ta vi c'o familias chupan re k'ataj ri man niquisiq'uij ta ruvech ri lok'olej tak tz'ibanic ronojel k'ij."
3. Kojsamej junan quiq'uin ri ka familia. Kojbiyin junan tok c'o ri acuchi yojbe vi.
4. Quexuque' junan ri achijlonel y ri ixjayilonel richin yech'o ak'anij riq'uin ri Ajaf ronojel k'ij.
5. Tiketamaj ri utzilej na'oj y ri coch'ibel y ri ajovabel (tatz'eta' c'a ri Moroni 7:45-48).
6. Kojbe jutakel pa ri molojri'il chupan ri K'ataj (tatz'eta' c'a ri DyC 59:9-10).
7. Tikabana' ri nubij ri Ajaf chupan ri DyC 88:119: Tinuc'u' apon ivi'. Tinuc'u' c'a ronojel ri nic'atzin. Tibana' can jun jay, ja', jun jay richin lok'olej ch'oven riq'uin ri Dios, jun jay richin mevayinic, jun jay richin cukubabel c'u'x, jun jay richin etamanic, jun jay richin c'ojlemal, jun jay richin ruchojmlal, jun jay richin ri Dios.
8. Tikatz'ibaj jantape' ri quibanobal ri ka familia y tikamolo' ronojel ri nic'atzin niketamaj pa quivi' ri kati't kamama'. Ri familia jare' ri tzobaj más c'atzinel chupan ri Ruk'ataj ri Jesucristo quichin ri Chojlaxela' chupan ri Ruq'uisibel tak K'ij. Re K'ataj re' c'o chuvach'ulef richin yeruto' ri familias richin niqil ri colotajic richin jumul. Ronojel ri c'o chupan ri K'ataj nuya' kuchuk'a' roj chikajujunal y yojruto' richin xkojcoje' quiq'uin ri ka familia benek ruvech.

Tatzijoj c'a achique modo xtikaben jun utzilej familia.

Tak'ijuj quiq'uin ri i familia achique tijonic xtiben chupan ri semanas e petenek.

Tabij chique conojel ri e c'o chupan ri familia chi tiquibij chique ri ch'aka' chic chupan ri familia chi yecajo'.

CH'AKA' CHIC MOCAJ RI UTZ YE'ANIC'OJ

Moisés 2:27-28 (ri achin y ri ixok yetz'ucutej y yeturusex)

Moisés 3:21-24 (ri ixok xyatej chire ri Adán richin noc rixjayil)

Génesis 2:24 (jun c'ulaj tiquibana' ri achin riq'uin ri ixok)

DyC 49:15-16 (ri Dios xubij chi kojco'ule')

Efesios 6:4 (que'atijoj ri ac'uala' riq'uin ruchojmlal)

DyC 132:15-21 (ri c'ulubic richin jumul)

DyC 88:119-126 (ri chojmlal richin niban jun utzilej familia)

RI BIX RI UTZ YE'ABIXAJ

"Yin In Ralc'ual Ri Dios" "Ronojel Utz Nivachin"